

Bybelstudie



17 April 2022

Leef om te dien

*By Sonstraal Gemeente is almal welkom –
hier leer ons saam om soos Christus te leef.*

Ons is geroep tot: Genade, Gasvryheid en Gestuurdheid.

Kom tot rus

Neem een sitplek weg of laat 'n sitplek oop, laat iemand 'n wit doek oor die sitplek gooi. Dié leë stoel is simbool van Jesus se teenwoordigheid in die groep. Sit ook 'n kers voor die stoel neer. Laat iemand die kers aansteek. Doen 'n gebed en dank Jesus dat Hy nou as lewende Heer by julle is. Laat 'n groepslid Jesaja 53:3 biddend voorlees.

Lees die teks

Johannes 20:1-18

Agtergrond

Maria Magdalena speel 'n belangrike rol in Johannes se opstandingsverhaal. Anders as in die ander Evangelies, vertel Johannes nie van die ander vroue wat ook na die graf toe gegaan het nie. Hy noem net vir Petrus en “die ander dissipel”, wat waarskynlik hy self was. Die verhaal bou op tot 'n hoogtepunt om aan te toon hoe verrassend die opstanding vir Maria Magdalena en die dissipels was: Selfs toe Jesus self met haar praat, dink sy eers dis die tuinopsigter.

Vers 16-17 vorm die hoogtepunt van die verhaal. Hier noem Jesus vir Maria Magdalena op haar naam. Dit is 'n baie persoonlike oomblik. Hy roep haar soos

die goeie herder sy skape op hulle naam roep en uit die kraal lei (Joh 10:3). In vers 17 sê Jesus vir haar sy moet Hom nie vashou nie.

Grawe dieper

- Noem enige iets uit die gedeelte wat jou geraak het. Of enige vrae wat jy nou het.
- Wat beteken Jesus se opstanding?
(Hier is 'n paar antwoorde)
Jesus se opstanding beteken.
 - Dit beteken dat Hy regtig “volbring” het (Johannes 19:30) – Hy het deur die dood gegaan en die volle prys vir ons sonde betaal. Hy het genoeg gedoen – en daarom het God Hom opgewek tot die lewe.
 - Dit beteken dat Hy die dood self oorwin het (1 Korintiërs 15:26) en vir ewig lewe.
 - Dit beteken dat ons wat in Hom glo, ook die belofte het: ons sal opstaan uit die dood en vir ewig lewe in God se heerlijkheid.
 - Dit beteken dat Hy nou by ons is en ons “meer as oorwinnaars” is in alles wat ons hier en nou wil onderkry.
- Behalwe die verwysing na Maria Magdalena in Luk. 8:2, vind ons haar ook by die kruis (Johannes 19:25). Sy was 'n vrou met 'n storie van seerkry en pyn. Een wat ook deur Jesus heelgemaak is. Waarom, dink julle, gebruik die Here altyd brose, brose en nederige mense?
- Maria kom by die graf aan op daardie Sondagmôre en sien dat die graf weggerol is. Wat, dink julle, moes deur haar gedagtes gemaak het? Watter emosies het sy ervaar, as julle julle in haar skoene indink?
- Binne die graf is daar onbetwisbare tekens van Jesus se opstanding, maar sy staan buite die graf en huil. Versinnebeeld dit nie dalk ook ons lewe nie? Ons sien tekens van hoop, maar glo dit nie maklik nie en word terselfdertyd oorweldig deur ander pynlike werklikhede soos siekte, verlies, swaarkry en teleurstelling. Gesels hieroor.

Bid

Christus, U wat die fontein van die lewe is, U was dors op Golgota.

Leer my om soos U na God te dors, en te dors na 'n lewe in liefde.

(Stil gebed)

Christus, U wat die lig vir die wêreld is, U was in die duister op Golgota.

Leer my om die lig van u liefde ook in donker tye te laat skyn.

(Blaas die Christuskers dood. Stil gebed)

Christus, U wat die brood van die lewe is, U het honger gely op Golgota.

Gee vir my 'n hart vir hulle wat honger en dors is in hierdie wêreld.

(Stil gebed)

Christus, U wat die weg, die waarheid en die lewe is,

U weg was die kruisweg; u waarheid die dwaasheid van die kruis; u lewe die swakheid van die kruis.

Leer my dat u krag juis in my swakheid werk.

(Stil gebed)

Christus, U wat die ingang van die skape is en die goeie herder;

U het U lewe neergelê sodat ons kan leef;

U het U liggaam gebreek sodat ons gevoed kan word;

U het Uself prysgegee sodat ons in u liefde gelei kan word.

Leer ons om na u stem te luister.

(Stil gebed)

Christus, U wat die ware wynstok is,

U het u lewe uitgestort sodat ons baie vrug kan dra,

vrug waardeur die Vader verheerlik kan word.

Laat ons met U verenig lewe.

(Stil gebed)

Amen.